

四庫全書

子部

欽定四庫全書

子部

書小史卷六至十

詳校官中書臣孫溶

編修臣程嘉謨覆勘

總校官降調編修臣念聖脉

校對官中書臣李奎

謄錄監生臣徐天駿

欽定四庫全書

書小史卷六

宋 陳思 撰

傳五

晉 宋 齊

康昕字君明外國人官至臨沂令善正草書與南州惠
式道人俱學二王輒以已書貸之世人有謬寶其蹟或
謂為羊欣王獻之嘗題方山亭壁數行昕密改之獻之
後過不疑又為謝居士題畫像以示獻之獻之歎能以

為西河之絕矣

惠式道人右軍之甥也學二王書歐陽通云其書與王
無別

何充字次道廬江人官至侍中司空善行書書賦云次
道淳實寡於風彩自是雄姿翰墨具在如士大夫之遊
華處叅貴冑而膚質未改

劉訥字行仁瑯琊人官至散騎常侍善正書書賦云行
仁靡雜唯鍾是師悅端閒於高軌能終始於清規雖帶

偏薄亦能隣幾若鳳雛始備於五彩長松僅攀于一枝
劉璞字子成南陽人官至光祿勳郎得道南嶽魏夫人
之子善行草書書賦云猗歟子成徇蹟過名正隸敦實
藁草沉輕元常高風雖踈復呈猶不考擊之鐘鼓含律
呂之音聲

劉瓌字元寶沛國人官至御史中丞義成伯善行草八
分太元中孝武帝令八分題諸門榜書賦云元寶剛直
兩王之次骨正力全軌範宏麗凌突子敬病於輕肆同

變武而習文若訪龍而獲驥

韋昶字文休即魏侍中誕兄涼州刺史康之元孫官至
潁川太守散騎常侍善古文大篆及草書每覽羲之父
子書云二王未是知書者也又妙作筆子敬得其筆稱
為絕世太元中孝武改治宮室及廟門並欲使王獻之
隸書題榜獻之固辭乃使劉瓌以八分書題之後又使
昶以大篆改之

江灌字道羣陳留人官至侍中中護軍善行書書賦云

道羣間漫氣格自充始習新制全移古風與伯輿王之
合極若子敬之童蒙猶富禮樂之世曹備神彩於厥躬
沈嘉字長茂吳郡人官至吳興太守善草書書賦云長
茂草勢既捷而踈慕王不及獨斷所如猶鷺鳥擊搏而
失中因蹭蹬於古墟

溫放之太原人嶠之子官至黃門侍郎善草書書賦云
放之率爾草健筆力豈忘保持足見準則猶片錦呈巧
細流不極

許靜民高陽人官至鎮軍叅軍工草隸為右軍高足善題宮殿額得方直之體其草稍乏筋骨亦景則李式之亞也

桓溫字元子譙國龍亢人尚南康公主官至丞相大司馬南郡公謚宣武善行草書唐人云溫書如快馬入陣屈伸隨人書賦云元子正草厚而不倫若遺翰墨猶帶真淳似山林之樂道非玉帛之能親

桓玄字敬道溫之子官至義興太守其後篡晉僭號偽

楚劉裕誅之玄景慕二王善於草法王僧虔云每自比
右軍議者未之許云可比孔琳之張懷瓘云玄草法譬
之於馬則肉肋已就蘭筋初成蓄怒而行日可千里玄
嘗取羊欣為征西行軍叅軍玄愛書呼欣就坐仍遣信
呼顧長康與共論書至夜不倦長康亦善書玄愛重圖
書每示賓客客有非好事者正食寒具以手授書書大
點汚玄惋惜移時自後每出圖書具令客盥手玄愛二
王書不能釋手乃選縑素及紙書正行之尤美者各為

一秩嘗置左右及南奔雖甚狼狽猶以自隨將敗並投
於江書賦云敬道耽玩銳思毫翰依憑右軍志在凌亂
草狂逸而有度正疎澁而猶憚如浴鳥之畏人等驚波
之泛岸

顧愷之字長康小字虎頭晉陵無錫人博學有才氣為
桓溫殷仲容叅軍善書畫寫特妙謝安深重之謂有蒼
生以來未之有也時人號為三絕謂癡書畫也

張彦遠云按長

康三絕者才絕書絕
癡絕也畫非其數

諸葛長民瑯琊陽都人官至輔國將軍宣城內史善行
書書賦云長民則全効子敬便於性分宏逸生於天機
衆妙總而獨運凌所師而小薄壯若已而不紊猶豁其
流而冰開殷其響而雷奮

素山松官至吳郡太守少有才名博學有文章善書梁
武帝云素山松書如深山道士見人便欲退縮

殷仲堪陳郡人官至冠軍將軍荊州都督能清言善屬
文能書亦王敬仁之亞也

陳暢滎陽人官至秘書令史善八分書晉宮觀城門皆暢書

楊真人諱羲弘農人居句容該涉經史有通靈之鑒善正行書簡文用為公府舍人後得道書賦云楊真人之正行兼淳熟而相成方圓自我結構遺名如舟楫之不繫混寵辱以若驚

謝靜不知何許人善隸書

謝敷字慶緒會稽人性澄靜寡慾隱居徵辟皆不就善

隸書王僧虔云謝靜謝敷並善寫經亦入能境

宋珽廣平人官至相府叅軍善行書書賦云宋珽矯矯足光利用習古者或以為輕目新者必因而重猶樸散而分形器務成而立賦頌

王綏字彥猷坦之之孫官至冠軍將軍荊州刺史善正行書

羊忱泰山人官至徐州刺史善行草書庾肩吾云聲擅毫翰動成楷則

羊固泰山人官至臨海太守善正行書

盧循字子先少名元龍官至征虜將軍廣州刺史善草
隸奕棊之勢循善尺牘尤珍名法西南豪士咸慕其風
家羸金帛競遠尋求於是京師三吳二王之蹟頗為所
得

宋劉穆之字道和東莞莒人官至侍中司徒善隸行書
與朱齡石並便尺牘嘗於武帝坐與齡石並答書自旦
至日中穆之得百函齡石得八十函而穆之應對無廢

書賦云道和閒雅離古躡真慢正尤德高踪絕塵若昂
藏博達之士謇諤朝廷之臣

朱齡石字伯兒沛人官至雍州刺史善尺牘

羊欣字敬元泰山南城人官至中散大夫義興太守少
靖默無競於人泛覽經籍尤長隸書師資大令張懷瓘
云敬元真書劣於子敬幾季孟之差行草則去之彌遠
子敬之後可以獨步時人云買王得羊非意所望今大
令書中風神怯而瘦者往往是羊也時有丘道護稱工

書親師子敬殊劣於羊欣書賦云敬元則親得法於子敬雖時移而間出手楷無方心敏奧術虛薄而不忘本分縱橫而粗得師骨遇其合時髣髴唐突猶圖騏驎而莫展素真仙而非實

孔琳之字彥琳會稽山陰人廡之子官至太常卿少好文義善隸行草書張懷瓘云師於小王稍露筋節飛流懸沫勢則呂梁之水焉時稱云羊真孔草又以縱快比於桓玄王僧虔云孔琳之放縱快利筆道流便二王以

後略無其比但功夫恨少自任故未能盡其妙故當劣於羊欣斯言逾矣

薄紹之字敬叔丹陽人官至給事中善書張懷瓘云與羊欣並憲章小王風格秀異若干將出匣光芒射人魏武臨戎縱橫制敵其行草書倜儻時越羊欣若周才取之則真正懸隔袁昂云字勢蹉跌如舞女低腰仙人嘯樹至於揮毫振紙有疾閃飛動之勢書賦云競其豐利又觀薄氏纖圓克成骨力猶稚精彩潤密乃誠莫掩掩

友凌師抑亦其次雖鉤無金價而珉實玉類

謝靈運陳郡人晉車騎將軍玄之孫也官至秘書監侍
中康樂侯善書模憲小王真草俱美張懷瓘云若石蘊
千年之色松標百尺之柯雖不逮師吸風吐雲籟蕩山
岳其亦庶幾靈運詩書皆兼獨絕每文竟手自寫之文
帝稱為二寶與顏延之為江左第一虞蘇云靈運母劉
氏乃獻之之甥故能書而特多王法王僧虔云子敬上
表多在中書雜事中靈運皆竊易其真本相與不疑元

嘉初帝就索始進焉親聞文皇說此

謝方明陳郡陽夏人官至會稽太守善正書書賦云方明寬和隱媚且潤如幽間女德禮教士允

謝惠連方明之子官至司徒府法曹叅軍幼有詞學族兄靈運深所歎伏書畫並妙

謝晦字宣明陳郡陽夏人官至中書令善書

見庾肩吾書品

謝莊字希逸官至中書令散騎常侍善行書

蕭思話南蘭陵人官至征西將軍左僕射解音律工書

受學於羊欣得行草之妙論者謂雖無奇峰壁立之秀
連岡盡望勢不斷絕亦可謂有功矣王僧虔云蕭全法
羊欣風流媚好殆欲不減筆力恨弱袁昂云羊真孔草
蕭行范篆各一時之妙也然上方琳之不足下比范曄
有餘書賦云思話綿密緩步娉婷任性工隸師羊過青
似鳬鷗雁鷺游戲沙汀

王曇首僧虔父也幼而素尚兄弟分財曇首惟取圖書
而已文帝時為侍中驍騎將軍善行書

范曄字蔚宗順陽人官至太子詹事蘊良史之才通音律之妙能談草隸小篆尤精師範羊欣慕其俊拔王僧虔云與蕭思話同師羊欣而曄後背叛皆失故步名亦稍退曄傳自序云吾書雖小小有意筆勢不快餘竟不成就每愧此名

張裕字茂度齊郡人官至會稽太守善行草書

張永字景初裕之子官至征西將軍涉獵經史能文章善隸書行草文帝曰卿書但少王法永對曰每恨二王

不得臣之體永更製御筆紙墨美殊前後書賦云茂度

逸翰景初清規或大言而峻薄

景初對文帝云臣恨二王不得臣體

或寡

譽而拙奇

王僧虔書用拙筆以自容

並心輕兩王蹟及宗師擬鶴鳴

而子和殊鯉退而學詩

謝綜中書侍郎述之子范曄甥也官至太子中舍人有

才藝善隸書王僧虔云謝綜書其舅云緊潔生起實為

得賞每不重羊欣欣亦憚之然書法有力恨少媚好

顏延之字延年瑯琊臨沂人官至金紫光祿大夫領湘

東王帥少孤貧居好讀書無所不覽文章冠絕當時尤
善書翰與陳郡謝靈運詞彩齊名江左稱顏謝焉文帝
嘗問延之諸子才能延之曰峻得臣筆測得臣文奩得
臣義躍得臣酒

顏峻字士遜延之之子官至右將軍揚州刺史善行書
書賦云顏氏儒門士遜墨妙大令典則中散氣調薄首
孔肩體格惟肖如驚弦履險避地膺峭

王裕之字敬宏晉驃騎將軍庾之曾孫官至侍中光祿

大夫善草書名與宋武帝諱同故以字行書賦云淮水茂族敬宏不墜故朝餘風翰墨兼至既約古而任逸亦遺能而獨駛猶荆挺植於昔人全樸畧而成器

王微字景元琅琊臨沂人少好學善屬文工書兼解音律醫方卜筮陰陽術數之事尤善行草微嘗獨處一室尋書玩古遂足不履地終日端坐牀席皆生塵埃惟當坐處獨淨世祖以貞栖絕俗贈秘書監

宗炳字少文南陽人前後辟召皆不就少文妙善琴書

圖書行草尤工每遊山水往輒忘歸凡所遊歷皆圖之於室坐卧嚮之其高情如此

丘道護善草書與羊欣同受筆法於王獻之殊劣於羊欣李嗣真云道護謬登高品迹乃浮漫

王思元瑯琊人官至南康太守善行書書賦云蔓衍枝
派思元不忘穩厚而無法度淳和而蓄鋒銳猶君子自
適順時行藏

桓護之字彥宗略陽人官至寧朔將軍善行書書賦云

桓公護之神凝筆遲富雅景之士規猶門寒道高衣薜
言詩

駱簡字正祖丹陽人官至鉅野令善行草書書賦云翩
翩正祖恭已法則師資小王深入閭域安知逸氣未詳
筆力猶驥異真龍紫非正色

龐秀之官至江州刺史善正書書賦云二王變古法有
所屬競競秀之歛翰謹束如仙童樂靜不見所欲

巢尚之字仲遠魯國人官至寧朔將軍善行書書賦云

仲遠循常由衷邇俗企彥琳

孔琳之

之牆仞遵茂度

張裕

之

軌躅豈聞一而得三同出吳而入蜀

裴松之字世期河東聞喜人官至散騎常侍善草書書

賦云世期旁通掘強斷利參方回

郗愔

之章法得敬元

羊欣

之草意匪庖丁之解牛同君子之不器

徐爰字長玉瑯琊人官至中散大夫善正書書賦云長

玉靡漫神閒態穠荷小王之偉質錯明帝之高蹤執德

而風塵不雜發言而禮義攸從

江僧安陳留人官至太子中庶子善行書書賦云江侯
僧安捷利而乾貌兼輕媚體出多端猶廣廷之卉木小
苑之峰巒

賀道力會稽人官至吳興令善草書王僧虔云顏騰之
賀道力並便尺牘書賦云道力草雄圓轉不窮壯自躬
之體格疲逸少之遺風獨立言而逍遙出世驗迹乃夙
夜在公

王道遠吳興烏程人即道隆之兄涉學善隸書形貌又

美吳興太守王韶之謂人曰有子弟如王道迄無所少也

齊王僧虔瑯琊臨沂人曇首之子官至尚書令簡穆公弱冠工書張懷瓘云祖述小王尤尚古直若溪澗含冰岡巒被雪雖極清肅而寡於風味子曰質勝文則野此之謂乎初宋文帝見其書素扇歎曰非惟蹟踰于敬方當雅量過之齊高帝善書及即位篤好不已嘗與僧虔賭書畢謂僧虔曰誰為第一僧虔對曰臣書臣中第一

陛下書帝中第一上笑曰卿可謂善自謀矣武帝工書
欲擅書名僧虔不敢顯其蹟嘗用拙筆書以此見容書
賦云僧虔則密緻豐富得能失剛鼓怒駿爽阻圓任強
然而神高氣全耿介鋒鏖發卷伸紙滿目輝光才行兼
而雙絕名實副而特彰如運籌決勝威震殊方

王慈字伯寶僧虔之子官至侍中冠軍善行書少與從
弟儉共書學謝鳳子超宗嘗候僧虔乃往東齋詣慈慈
正學書未即放筆超宗曰卿書何如虔公慈曰慈書比

大人如雞之比鳳超宗狼狽而退

王志字次道慈之弟官至侍中吏部尚書善篆隸當時
以為楷法游擊將軍徐希秀亦號能書常謂志為書聖
書賦云伯寶次道並資義訓兄則雜而外兼稟家君於
已分弟則纖薄無滯過庭益俊並能寬閒墨妙逸速毫
奮比達士與君子人不知而不愠

王儉字仲寶僧綽之子官至尚書令善正書

褚淵字彥回河南陽翟人少有世譽善草隸書宋末與

高帝同掌樞密齊臺建以佐命功授司徒中書監書賦
云彥回無節筆翰亦爾決利不拘足用而已如拔楓柳
抑亦杞梓

褚賁字蔚先淵之子官至秘書監善隸書因父憂免職
便不仕時人以為恥父失節於宋室遂爾屏居書賦云
蔚先忠良自我名揚老成不虧和雅允臧如窮隱肥遯
志傲侯王

劉休字宏明沛郡相人建元初官至御史大夫出為豫

章太守善隸書初羊欣授子敬正隸法衆共宗仰以右
軍之體微古不復見貴及休始好右軍法因此大行
源楷之字郗延官至黃門侍郎善草隸

徐孝嗣字始昌東海人官至太尉尚書令善正書書賦
云非禮不言從容始昌如碩德君子道義難量而盛德
有素筆精源長

劉係宗丹陽人官至寧朔將軍宣城太守少便書畫尤
工行草在宋為竟陵王誕子景粹侍書入齊為東宮侍

書

蕭惠基思話之子官至左僕射善隸行書及奕碁之勢
張欣泰字義亨竟陵人少有志貌不以武業自居好讀
子史善隸書

到撫字茂謙彭城人官至太子洗馬御史中丞善行書
書賦云茂謙則壯而不密騁志恒俗輕師模任縱欲如
勇夫格獸徑越林麓

顧寶光吳郡人官至司徒左曹掾工畫善行書寶光卓

越多奇自以技能王僧虔嘗作飛白書以示之寶光曰
下官今為飛白屈矣

胡諧之豫章南昌人官至度支尚書善行書書賦云寶
光諧之同調合韻差池去就羽翮齊振依蕭附王但曰
慕蘭論骨氣而胡壯驗精神而顧峻猶岸柳之先春得
地連於河潤

紀僧真建康人善隸書事高帝在淮陰以嫺書題令答
遠近書蹟自寒宦歷至高帝冠軍府將軍主簿初上在

領軍府令僧真學上手蹟下名至是報答書疏皆付僧真上觀之笑曰我亦不復能別也

紀僧猛僧真之弟官至晉熙太守有風姿舉止善隸書又能飛白書

徐希秀瑯琊人官至驍騎將軍善行書書賦云希秀之蹟敬叔薄紹之之倫正則謹促有度草則拘檢靡伸如儉

德君子清朝士人

張融字思光吳郡人官至司徒左長史書兼諸體尤工

於草如風裊春林甚有媚好齊梁之世殆無以過嘗自
美其能帝曰卿書殊有骨力但恨無二王法融答曰非
恨臣無二王法亦恨二王無臣法書賦云思光逸才揮
翰無滯超寶光之力從僧虔之制越恒規而涉往出衆
格而靡繼如塞路蓬轉摩霄鳶唳

謝朓字元暉陳郡陽夏人官至吏部郎中風華黼藻獨
步當時工草隸蟲篆張懷瓘云書甚有聲草殊流美亦
猶薄暮川上餘霞照人春晚林中飛花滿目顏延之亦

善草書即朶之亞也

宗測字敬微炳之孫也代居江陵不應召辟驃騎將軍
豫章王嶷請為叅軍測答曰何為謬傷海鳥橫斤山木
性善書畫傳其祖業

劉瑱字士溫彭城人官至吏部郎中聰慧多才藝工書
畫

劉繪字士章彭城人性通悟有文義善隸書進對華敏
數被召賞官至司馬從事中郎撰能書人名一卷嘗自

云善飛白書言論之際頗好矜知

王僧祐字允宗微之從子官至黃門郎雅好博古善老
莊不尚繁華工草隸善鼓琴

周顒字彥倫汝南安城人初為文惠太子中軍叅軍歷
官至中書郎兼著作常游侍東宮少從外氏車騎將軍
臧質家得衛恒散隸書法學之甚工尤善行隸文惠太
子使顒書元圃茅齋壁國子祭酒何允以倒薤書求就
顒換之顒笑而答曰天下有道丘不與易也李嗣真云

彥倫迹少俊銳可嘉

書小史卷六

欽定四庫全書

書小史卷七

宋 陳思 撰

傳六

梁 陳

梁蕭子雲字景喬晉陵人齊豫章王嶷第九子官至侍中少善書小篆草行諸體兼備張懷瓘云特妙飛白意趣飄然點畫之際有若騫舉妍妙至精難與比肩但少乏古風抑居妙品歐陽詢云蕭侍中飛白輕濃得中如

蟬翼掩素遊霧崩雲可得而語其真書少學子敬晚師
元常得其體勢雖少乏力及其暮年筋骨亦備名蓋當
世舉朝效之梁高祖雅重其書常論子雲書曰筆力勁
駿心手相應巧踰杜度美過崔實當與元常並驅爭先
其見賞如此子雲出為東陽太守百濟國使人至建業
求書逢子雲為郡維舟將發使人於渚次候之望船拜
行前子雲遣問之荅曰侍中尺牘之美遠流海外今日
所求惟在名迹子雲乃為停船三日書三十紙與之獲

金貨數百萬書賦云景喬則潤色鍾門性情勵已豐媚
輕巧纖曼旖旎詩雖易其國風賜豈賢於夫子猶驚窺
鏡而鼓翼虎不啞而履尾

蕭特字世達子雲之子官至太子舍人海鹽令善草隸
時人比之衛恒衛瓘武帝嘗使特書及奏帝曰子敬之
迹不及逸少蕭特之書遂逼於父

蕭幾字德元齊曲江公遙欣之子年十歲能屬文性溫
和與物無競清貧自立好學善草隸書累遷新安太守

蕭確字仲正邵陵王綸之子官至廣州刺史永安侯有
文才善行草尤工正書公家碑碣一皆使之初除祕書
丞武帝曰為汝能文故有此授書賦云仲正則寬而壯
賒而密婆娑蹢躅綽約文質稟庭訓而微過任天然而
自逸若衆山之連峰探仙洞而不一

王彬字思文志之弟好文章習篆隸與志齊名時人為
之語曰三真六草為天下寶尚齊高帝女臨海長公主
拜駙馬都尉天監中歷吏部尚書祕書監梁武帝云王

彬放縱快利筆道流便

王籍字文海僧祐之子好學有才氣官至佐唐侯相甚
工草書筆勢適放蓋孔琳之流亞也書賦云文海緊快
勢逸氣高未忘俗格銳意操刀猶樂成名於朝野嗤遁
迹於蓬蒿

陸杲字明霞吳郡人官至光祿大夫揚州大中正好辭
學工書畫其舅張融有高名杲風韻舉止頗類時稱曰
無對日下惟舅與甥書賦云陸杲迅熟騁捷遺能任縱

便無風稜如郊垌羽獵玃玃奔騰

陶弘景字通明丹陽秣陵人官至諸王府侍讀永明中
辭祿遂止句曲山自號華陽隱居好著述明衆藝善書
師祖鍾王采其氣骨雜以楊許之法然真書體勢歐虞
往往得之嘗荅梁武帝論書啟云愚固博涉患未能精
苦恨無書願作主書吏晚愛楷隸又美典掌之人言人
生數紀之內識解不能周流天壤區區惟恣五慾實可
愧耻每云得作才鬼猶勝頑仙武帝嘗欲徵用隱居畫

二牛一以金龍頭牽之一則逶迤就水草梁武知其意
不以官爵逼之朝廷有事多詢之號山中宰相書賦云
通明高爽緊密自然擺闔宋文峻削阮研載窺逸軌不
讓真仙猶龍髯鶴頸奮舉雲天

阮研字文幾陳留人官至交州刺史善書其行草出於
逸少精熟尤甚其勢若飛泉交注奔競不息張懷瓘云
文幾與子雲齊名時稱蕭阮等各得右軍一體而此公
筋力最優比之於勇則被堅執銳所向無前論之於談

則緩頰朵頤離堅合異有李信王離之攻取無子貢魯連之變通可謂力過宏景雄蓋子雲其隸則習於鍾公風致稍怯庾肩吾云阮研居今觀古盡窺衆妙之門雖師王祖鍾終成別構一法亦有得矣書賦云文磯纖潤穩正利草輒媚橫流姿容媚好若其抑阮褒殷庶幾同塵似泉激溜於懸磴木垂條於晚春

王僧孺字僧孺東海郟人官至北中郎諮議參軍幼聰慧及長篤愛墳籍工屬文善楷隸聚書至萬卷率多異

本

沈約字休文吳興武康人官至尚書令太子少傅博通

典籍善屬文工草書

見法帖

柳惲字文暢官至吳興太守好學善尺牘能鼓琴特窮其妙梁武帝云柳惲書縱橫廓落大意不凡而德體未備

任昉字彥昇樂安人官至吏部郎掌著作善草書家藏書萬卷書賦云體雜間利覩夫彥昇構牽掣而無法任

胃懷而足憑猶注懸泉咽凝冰

殷鈞字季和陳郡長平人好學有思理善隸書為當世楷法尤工行草南郡范雲樂安任昉並稱美之起家祕書郎鈞在職校定祕閣四部書更為目錄又受詔科檢西省法書古迹別為品目官至國子祭酒書賦云季和慢速風規所屬圓轉頗通骨氣未足

蕭賁字文煥竟陵王孫也官至河東太守幼好學有文才能書畫嘗於扇上圖山水咫尺之間便覺萬里為遙

矜慎不傳自娛而已

傅昭字茂遠北地人官至祕書監善草書書賦云茂遠
捷銳足以自給彥和連環迅不可及如過雨之奔簷雷
飛燎之赫原隰

朱異字彥和吳郡人居貧以傭書自業寫畢便誦涉獵
文史通雜藝博奕書筭尤善草書

陸倕字佐公吳郡人慧曉之子官至太常卿少勤學能
屬文善行草書

庾詵字彥寶新野人幼聰悟武帝詔以為黃門侍郎不起篤學經史百家無不該綜書射纂筭並一時之絕

丁峴洪亭人頗善屬文殊工草隸顏氏家訓云孝元在荊州書記一皆委之軍府輕賤多未之重耻令子弟以為楷法云丁君十紙不敵王褒數字吾雅愛其手迹嘗所寶持孝元嘗遣典簽惠編送文章示蕭祭酒問云君王比賜書翰及寫詩筆殊為佳手姓名為誰都無聲問編以寶答子雲歎曰此人後生無比遂不為世所稱亦

是奇事於是聞者少復刮目稍仕尚書儀曹郎後為晉安王侍讀隨王東下及西臺陷沒簡牘湮散丁尋歿於揚州前所輕者後思一紙不可復得

到沆字茂濯齊御史中丞撫之子官至北中郎諮議參軍美風神容止可觀善屬文工篆隸

索昂字千里陳郡陽夏人仕齊為祕書監黃門侍郎入梁官至中書監幼以孝稱善書畫嘗著書評一卷

劉慧斐字宣文彭城人少博學能屬文起家安成王法

曹叅軍後不仕與處士張孝秀居東林寺相得甚歡尤明釋典工篆隸在山手寫經二千餘卷

張孝秀字文逸南陽宛人為建安王別駕頃之遂去職歸廬山居東林寺性通率不好浮華博涉羣書專精釋典善談論攻隸書凡諸藝能莫不明習

孔敬通官至東宮學士能一筆草書一行不斷婉約風流特出天性頃來莫有繼者又創為左右書當時座上酌荅無有識者庾元威見而喜之遂呼為衆中清閒法

庾元威字少明善蟲篆及雜體書作書論一篇行於世
徐僧權東海人官至梁東宮通事舍人領祕書以善書
知名

劉孝綽字孝綽齊司馬從事中郎繪之子幼聰敏七歲
能屬文號為神童歷官祕書監善草隸自以書迹似父
乃變為別體

范懷約吳郡人官至東宮侍書善正行書梁武帝云范
懷約真書有力而草行無功故知簡牘非易書賦云蠡

蠡懷約任已作制若孤陋儒生辛勤一藝

江禧字彥標濟陽考城人官至光祿大夫善行書書賦
云彥標氣懦任力或滯猶翮短風高升沉靡制

江祿字彥遐禧之弟幼篤學有文章工書善琴位至太
子洗馬湘東王錄事叅軍

徐伯珍字文楚東陽人少孤貧學書無紙嘗以竹箭箬
葉甘蔗及地上學書遂工楷隸

顏協字子和瑯琊臨沂人為湘東王記室少博涉羣書

工草隸飛白吳人范懷約能隸書協學其書殆過真也
荆楚碑碣皆協所書時有會稽謝善勛能為八體六文
方寸千言京兆韋仲善飛白並在湘東王府善勛為錄
事叅軍仲為中兵叅軍府中以協優於韋仲而減於善
勛

庾肩吾字慎之新野人官至度支尚書才華並秀草隸
兼善張懷瓘云歷記專精遍採名法亦可謂瞻聞之士
也然志雖奇古而手不副情文勝質史是之謂乎自號

玄靜先生撰書品論一卷書賦云肩吾通塞併之天性
工歸文華拙見草正徒聞師阮何至遼夏使鉛刀之均
鋒稱並利而則佞

陳顧野王字希馮吳郡吳人官至黃門侍郎領大著作
幼好學長而徧覽經史精記默識天文地理著龜占候
蟲篆奇字無所不通尤善丹青時王褒能書俱為宣城
王賓友人號二絕書賦云接武隨波雷同野王如異磬
肥之挺質俱松栢之凌霜

徐陵字孝穆東海人官至左光祿大夫太子少傅善正書書賦云孝穆鄙重剛毅任拙猶偏裨武夫膽勇智劣趙知禮字齊旦天水隴西人官至右衛將軍涉獵文史善書翰工楷隸

張正見字見贖清河東武城人幼好學有清才善行草書仕梁為彭澤令入陳遷尚書度支郎

謝貞字元正幼有至性年十三善左氏工草隸蟲篆後為南平王友掌書記

周宏讓汝南人天嘉初為太常卿光祿大夫善草隸書賦云宏讓迅快放誕可觀利疾速著輕環若巖居僻陋蔓木樛盤

王克瑯琊人官至尚書僕射善草書書賦云名劣筆健乃逢王克通流未精疎快不忒猶腐儒宿士運用自得蔡景歷字茂世濟陽考城人官至度支尚書少俊爽有孝行家貧好學善尺牘工草隸

蔡徵字希祥景歷之子官至中書令善草書書賦云翩

翩濟陽茂世希祥任樸無聞適俗不忘父輕而迅子凜
而強

孫瑒字德璉吳郡人官至起部尚書少儻好謀略博
涉經史尤便書翰

毛喜字伯武滎陽武人官至光祿大夫領右驍衛將
軍少好學善草隸陳武帝素知之書賦云快哉伯武心
空手敏古風若遺令範惟允如平郊逸驥晚景飛隼

蕭乾字思惕蘭陵人官至五兵尚書容止雅正性恬簡

善草隸得叔父子雲之法

蕭引字昇休官至正威將軍性聰敏博學能屬文善隸書為當時所重宣帝嘗披奏事指引署名曰此字筆勢翩翩似鳥之欲飛引謝曰此乃陛下假其毛羽耳又謂引曰我有所忿見卿輒意解何也引曰此自陛下不遷怒臣何預此恩

江總字總持濟陽人官至尚書令善草書書賦云坡陀總持獨步方外甘率性而衆異非接武於興會若時違

隱淪卒不冠帶

沈君理字仲倫吳興人官至侍中尚書右僕射善草書
書賦云仲倫則快速無度馳突不踈尺題已終筆勢仍
餘似逸籠檻之衆鳥恣飛鳴之所如

蔡凝字子居濟陽考城人官至信威晉熙王府長史幼
聰悟美容止既長博涉經傳有文詞尤工草隸

丁真善正書宣帝於太極殿內作鼎刻忠臣烈士名詔
真書之

謝嘏字含茂陳郡人官至侍中中書令風神清雅頗善屬文尤工行草書賦云含茂悠悠荐臻同德迫時季而陵替俱道喪於翰墨徒麋鹿為後先非勝負可差忒

袁憲字德章陳郡人官至右僕射善草書書賦云德章率爾流浪急速骨氣乍高風神入俗符縱志而失道等潰河與顛木

賀朗會稽人官至祕書監善行書書賦云賀氏曰朗雖非動人不事筆力猶阻學貧若宦遊旅泊衣化風塵

伏知道昌平人官至鎮北長史善草書書賦云知道則
寬疎弛慢無可取則削凡常病室塞猶岸陸縱獺艱辛
騁力

侯安都字成師始興曲江人官至侍中征北將軍涉獵
書傳工隸書善騎射

劉顗好文學工草書為司空功曹待詔文林館

書小史卷七

欽定四庫全書

書小史卷八

宋 陳思 撰

傳七 後魏 北齊 後周 隋

後魏崔悅字道儒清河東武城人善草隸與范陽盧諶並以博藝齊名故魏初重崔盧之書諶傳子偃偃傳子邈悅傳子潛潛傳子宏世不替業

崔潛悅之子善隸草常為兄渾等誅手筆本草延昌初

著作佐郎王遵業買書於市遇得之年將二百寶其書迹深藏秘之武定中遵業子松年將以遺黃門郎崔季舒人多摹搨之左先祿大夫姚元標以工書知名於時見潛書以為過於浩也

崔宏字玄伯潛之子官至吏部尚書爵白馬公少有俊才尤善草隸為世模楷行押特盡精巧宏自非朝廷文誥四方書檄初不妄染故世無遺迹

崔浩字伯淵宏之子官至司徒博覽經史玄象陰陽百

家之言無不該覽太祖以其工書常置左右人多託寫
急就章從少至老初不憚勞所書蓋以百數浩書體勢
及其先人而巧妙不如也世寶其迹多裁割綴連以為
模楷

崔簡

一名覽

字仲亮浩之弟好學少以善書知名道武初

歷中書侍郎爵五等侯叅著作事

崔衡字伯玉官至內秘書中散少以孝行著稱善隸札
學崔浩頗亦相類當時詔命及御所覽書多其迹也

盧玄字子真范陽涿人曾祖諶晉司空劉琨從事中郎
祖偃父邈並仕慕容氏初諶父志法鍾繇書子孫傳業
累世有能名至玄父邈以上兼善草迹玄子伯源習家
法代京宮殿多其所題白馬公崔宏亦善書世傳衛瓘
體魏初工書者崔盧二門

盧晏博學善隸書有名於世位給事黃門侍郎

江式字法安陳留濟陽人六世祖瓊字孟琚晉馮翊太
守善蟲篆詁訓永嘉大亂瓊棄官投張軌子孫因居涼

土世傳家業祖強字文威涼州平內徙代京上書三十
餘法各有體例又獻經史諸子千餘卷擢拜中書博士
式少專家學篆體尤工洛京宮殿諸門榜題皆式書也
延昌中撰集字書號曰古今文字凡四十卷以許氏說
文為本上篆下隸官至符節令兼著作郎
江順和式兄之子官至征虜將亦工篆書

盧魯元昌黎徒河人敏而好學寬和有雅度以工書有
文才累遷中書監領秘書事賜爵襄城公善正隸書

谷渾字元冲昌黎人道武時以善隸書為內侍左右太
武時累遷侍中儀曹尚書賜爵濮陽公

竇遵頓丘衛國人善楷篆北京諸碑及臺殿樓觀宮門
題署多遵書位至濮陽太守

竇僧演遵之子以善書拜庫部令

崔挺字雙根博陵安平人少敦學業多所覽究舉秀才
射策高第拜中書博士轉中書侍郎以工書受勅於長
安書文明太后父燕宣王碑賜爵泰昌子

沈法會兗州人能隸書宣武在東宮勅法會侍書後以隸迹見知於閭里者甚衆未有如崔浩之妙

劉芳字伯友彭城人官至安東將軍青州刺史善正書少時聰敏過人篤志墳典晝則傭書以自資給夜則讀誦終夕不寢嘗為諸僧寫經論筆迹稱善卷直一縑歲中能入百餘疋如此數年賴以頗振著音義明辨疑者皆往詢訪故時人號為劉石經撰急就篇續注音義三

卷

劉懋字仲華芳之從子官至太尉司馬聰敏好學博綜經史善草隸書識奇字

郭祚字季祐太原晉陽人官至征西司馬將軍雍州刺史祚涉獵經史習崔浩尺牘文章見稱於世尤善行書柳僧習官至潁川太守敏於當世特善正書

柳楷字士則河東解人善草書頗涉文史位撫軍司馬夏侯道遷譙國人歷華瀛二州刺史遍覽書史嫺習尺牘

庾道穎川人歷覽史傳善草隸仕梁位右中郎將與夏侯道遷俱入魏後為饒安令卒

曹世表字景昇魏大司馬休九世孫性雅正工尺牘涉獵羣書孝昌中為尚書右丞遷東南道行臺

孫伯禮武邑人光祿大夫惠蔚之子善隸書位國子博士

裴敬憲字孝虞河東聞喜人為太學博士少有志行學博才清工隸草解音律

王世弼京兆霸城人官至中山內史平北將軍魁岸有壯氣善草隸書好窮墳典

王由字茂道世弼之子位至東萊太守好學有文才尤善草隸書性方厚有名士風又工摹書為時人所服

李苗字子宣梓潼涪人官至尚書左丞善屬文工尺牘
蔣少遊樂安博昌人有才學敏慧機巧工畫善行草書
及雕刻官至將作大匠太常少卿前將軍都水兼此四

官

劉仁之字山靜歷位衛將軍西兗州刺史少有操尚粗
涉書史真草筆迹頗號工便

李思穆官至營州刺史工草隸為當時所稱

沈嵩官至司馬即文秀族子善行書

呂溫字晦陽為上黨太守善隸書

盧淵官至秘書監善正書傳鍾法有能名

宇文忠之河南洛陽人官至右丞涉獵文史頗有筆札
尤善行草

北齊趙隱字彥深南陽宛人性聰敏善書計初為尚書令司馬子如賤客供寫書子如善其無誤用為書令史神武在晉陽索二史子如舉彥深後徵補大丞相功曹叅軍專掌機密文翰多出其手稱為敏給累官至司徒張景仁濟北人幼孤家貧以學書為業遂工草隸選補內書生與魏郡姚元標潁川韓毅同郡袁買奴滎陽李超等齊名世宗並引為賓客天保八年勅教太原王紹德書後主在東宮世祖選善書人性行淳謹者令侍書

景仁遂被引擢後主登祚歷位至開府侍書如故尋除
侍中封建安王自倉頡以來八體取進一人而已

崔季舒字叔正挺之從子官至光祿大夫待詔文林館
涉獵經史長於尺牘有當世才具

杜弼字輔元中山曲陽人幼聰敏為征虜府墨曹叅軍
典管記弼長於隸札每為時輩所推

韓毅魯郡人工正書神武用為博士以教彭城景思王

浹

元行恭河南洛陽人美姿貌兼俊才善正行書位中書舍人待詔文林館

李元護遼東襄平人少有武力仕齊位馬頭太守雖以將用自達然亦頗覽文史習於尺牘

劉珉字仲寶彭城人官至三公郎中善行草書李嗣真云珉書如顛波赴海狂濶爭流書賦云蕭條北齊浩汗仲寶劣充凡正備法緊草遐師右軍倏爾由道究千變而得一乘薄俗而居老如海岳高深青分孤島

劉元平珉之子高道不仕贈貞範先生善行草書

殷英童善楷隸書兼工畫

後周黎景熙字李明河間鄭人從祖廣魏太祖時為尚書郎善古學從崔宏崔浩受學字義楷篆自是家傳其法李明亦傳習之頗與許氏小異周文徵入關令李明正定古今文字於東閣歷官至車騎將軍儀同三司

趙文深字德本南陽宛人少學楷隸年十一獻書於魏帝後立義歸朝除丞相府法曹叅軍文深雅有鍾王之

則筆勢可觀當時碑榜惟文深及龔雋而已太祖以隸書紕繆令文深與黎季明沈遐等依說文及字林判定六體成一萬餘言行於世及隋文帝平江陵之後王褒入關貴游等翕然並學褒書文深之書遂被遐棄文深慙恨形於言色後知好尚難反亦改習褒書然竟無所成轉被譏議謂之學步邯鄲焉至於碑榜餘人獨莫之建王褒亦每推先之宮殿樓閣皆其迹也世宗令至江陵書景福寺碑漢南人士亦以為工梁主蕭詧觀而美

之賞遺甚厚天和元年露寢等初成文深以題榜之功除趙興郡守

趙仲將彥深之子官至給事黃門侍郎散騎常侍沉敏有父風溫良恭儉雖妻子亦未嘗怠慢終日儼然學涉羣書善草隸雖與弟書書字楷正云草不可不解若施之於人即似相輕易若當家卑幼又恐其疑所在宜爾是以必須隸筆

冀雋字僧雋太原陽邑人性沉謹善隸書特工模寫太

祖令雋偽為魏帝勅書與費士顯令將兵助太祖討侯
莫陳說雋依舊勅模寫及代舍人主書等署與真無異
顯嘗得魏帝勅書及見此勅不以為疑遂遣步騎一千
授太祖節度尋徵教世宗及諸王隸書時俗入書學者
亦行束修之禮謂之謝章雋以書字所興起自倉頡若
同常俗未為合禮遂啟太祖釋奠倉頡及先聖先師官
至驃騎大將軍開府儀同三司

王褒字子淵瑯琊臨沂人官至司空博覽文史尤工屬

文特善草隸梁國子祭酒蕭子雲褒之姑夫也褒以姻戚去來其家遂相模範俄而名亞子雲並見重於世雖風神不峻亦士君子之流也

蕭撫字智遐蘭陵人梁武帝弟安成王秀之子也博觀經史雅好屬文侯景亂武陵王紀稱帝於蜀以撫為益州刺史周文伐蜀撫降歷少傅蔡陽郡公撫善草隸名亞於王褒

蕭慨梁武帝弟司空鄱陽王恢之孫深沉有體表好學

善草隸書歷著作佐郎待詔文林館終於司徒從事中郎

竇慶扶風平陵人襲封陳公有姿儀性和厚工草隸
竇璡慶之弟亦工草隸頗解音律官至潁川南郡扶風
太守

庾信字子山南陽新野人梁散騎常侍肩吾之子幼而
俊邁博覽羣籍善行書仕周位至驃騎將軍開府儀同
三司

柳宏字匡道官至御正下大夫少聰穎亦善草隸博涉羣書辭彩雅贍與弘農楊素為莫逆之交

元禮少有志氣好弓馬嫻草隸有士君子之風累遷征東將軍

顏之推字介瑯瑯臨沂人協之子聰穎機悟博識有才辯工尺牘大象末為御史上士

薛慎字伯護河東汾陰人好學能屬文善草書歷中大夫保定初出為湖州刺史

隋楊素字處道弘農華陰人少落拓有大志不拘小節
善屬文工草隸

盧昌衡字子均范陽人官至祠部侍郎太子左庶子風
神澹雅博涉經史工草行書書賦云昌衡跌宕率爾而
作雖蔑法而或乖乃由衷而不忤似野筍成竹長風隕
擗

閻毗榆林盛樂人能篆書工草隸尤善畫為當時之絕
周武帝時拜儀同三司隋文帝愛其才藝令侍東宮官

至朝散大夫將作少監

趙孝逸湯陰人官至四門助教深師右軍逸効大令甚
有功業當平梁之後王褒入國舉朝貴胄皆師於褒惟
孝逸與文深二人獨負二王之法俱入隋臨二王之迹
人間往往為貨耳書賦云文深孝逸獨慕前蹤至師子
敬如欲登龍有宋齊之面貌無孔薄之心胃

釋智永會稽人師遠祖逸少工草隸妙傳家法嘗臨寫
真草千文八百本散與人外江東諸寺各施一本今有

存者猶直數萬錢住吳興永欣寺積年臨書所退筆頭
置之大竹簾受一石餘而五簾皆滿人來覓書或求乞
師者如市所居門限為之穿穴乃用鐵葉裹之人謂之
鐵門限後取筆頭瘞之號退筆塚自製其銘張懷瓘云
師遠祖逸少歷紀專精攝齊升堂真草惟命夷途良轡
大海安流微尚有道之風半得右軍之肉兼能諸體於
草最優氣調下於歐虞精熟過於羊薄

釋智果會稽人工書銘石煬帝甚善之其為瘦健造次

難類嘗謂永師曰和尚得右軍肉智果得其骨張懷瓘云夫字有萬象元鑑於心好其體質而布其意且筋骨藏於膚肉山水不厭高深而此公稍乏清幽傷於淺露若吳人之戰輕進易退勇而非武虛張夸耀果隸行入能品時有僧休僧特與果俱師智永休困於肥鈍特傷於瘦怯皆不得中而智果差優書賦云智永智果禪林筆精天機淺而恐泥志業高而克成或拘凝重蕭索家聲或利凡通周章擅名猶能作緇門之領袖為當代之

準繩並如君子勵躬於有道高人保志而居貞

釋敬脫善正書能用大筆寫方文字天然邁勁不加修飾當時謂之僧傑

庾持字元德潁川鄢陵人篤志好學尤善書記以才藝聞名官至步兵校尉持善字書每屬書好為奇字

虞綽字士裕會稽餘姚人官至著作佐郎博學有俊才尤工草隸

丁道護官至襄州刺史從事善正書蔡君謨云道護書

兼後魏遺法隋唐之交善書者衆皆出一法道護所得最多

虞世基字懋世會稽餘姚人博學有高才兼善草隸官至內史侍郎

房彥謙字孝冲清河人官至司隸刺史解屬文善草隸人有得其尺牘者皆寶玩之前後居官所得俸祿皆以周恤親友家無餘財嘗從容獨笑顧謂其子玄齡曰人皆因祿富我獨以官貧所遺子孫在於清白耳書賦云

彦謙草力浮緊循常糟粕右軍之化依稀夫子之牆如
益星榆之衆象無月桂之孤光

史陵善正書筆法精妙不減歐虞張懷瓘云褚遂良嘗
師受史陵然史亦有高古傷於踈瘦

書小史卷八

欽定四庫全書

書小史卷九

宋 陳思 撰

傳八 唐

唐房玄齡字喬齊州臨淄人隋司隸彥謙之子官至司空文昭公幼警敏貫綜墳籍善屬文書兼草隸後圖形凌烟閣讚云才兼翰藻思入機神書賦云房文昭則雅而和隱乃訛精神乏氣胷臆餘波若蘋萍無品共泛中

河

歐陽詢字信本潭州臨湘人歷太子率更令幼孤陳中書令江總收養之教以書記聰悟絕人博覽古今書則八體盡能筆力勁險尤妙古篆高麗愛其書遣使請焉神堯嘆曰不意詢之書名遠播夷狄嘗行見索靖所書碑觀之去數步復返及疲乃布坐至宿其傍三日乃得去其所嗜類此張懷瓘云詢飛白冠絕峻於古人有龍蛇戰鬪之象雲霧輕濃之勢風旋雷激操舉若神真行

出於大令森森焉若武庫矛戟風神嚴於智永潤色寡
於虞世南其草書跌宕通流示之二王可為動色然驚
奇跳駿不避危嶮傷於清雅之致自羊薄之後略無勅
敵

歐陽通詢之子也累官殿中監蚤孤母徐教以父書懼
其惰嘗遺錢使市父遺迹通乃刻意臨倣以求售數年
書亞於詢父子齊名號大小歐陽體通晚自矜重以狸
毛為筆覆以免毫管皆犀象非是未嘗書書賦云學有

大小夏侯書有大小歐陽父掌邦禮子居廟堂隨運變
化為龍為光

虞世南字伯施會稽餘姚人官至秘書監永興公性沉
靜寡欲博達古今善正行草書出於大令太宗每稱其
五絕一曰德行二曰忠直三曰博學四曰文詞五曰書
翰世南始學書於浮屠智永遠究其法為世秘愛張懷
瓘云其書得大令之宏規合五方之正色姿榮秀出智
勇存焉絕頂危峰處處間起行草之際尤所偏工及其

暮齒加以邁逸書賦云永興超出下筆如神不落踈慢
無慙世珍然則比文幾

阮研

而老成與貞白

陶弘景

而德鄰

如層臺緩步高謝風塵

虞纂世南族子書翰甚工有叔父體則而風骨不逮

虞煥世南之孫善書竇泉云子纂孫煥皆能繼世煥授

武官在仗宿衛初隋有猛將來護兒子恒濟皆負才學

入唐繼登三事故陸元方云來護兒兒把筆虞世南男

帶刀言物極則反一至於此書賦云纂煥嗣聖體多拘

檢如彼碣磨亂其琬琰

褚遂良字登善杭州錢唐人官至右僕射河南公博涉
文史工隸楷書太宗嘗歎曰虞世南死無與論書者魏
徵白見遂良帝令侍書帝方博購王羲之故帖天下爭
獻然莫能質其真偽遂良獨論所出無舛冒者嘗問虞
世南曰吾書何如智永答曰吾聞彼一字直五萬君豈
得此曰孰與歐陽詢曰吾聞詢不擇紙筆皆得如志君
豈得此遂良曰然則何如世南曰君若手和筆調固可

貴尚遂良大喜張懷瓘云遂良少則服膺虞監長則祖述右軍真書甚得媚趣若瑤臺青瑣宵映春林美人婢媚似不任乎羅綺鉛華綽約甚有餘態遂良亦嘗師受史陵然史亦有高古傷於疎瘦書賦云河南專精克儉克勤伏膺告誓銳思猗文恐無成於畫虎將有類於效顰

曹憲揚州江都人官至秘書學士精諸古字於小學家尤邃自漢杜林衛宏以後古文泯絕至憲此學復興撰

桂苑珠叢一百二十卷體製擬顧野王玉篇以小篆八分隸書三體正御本甚精

顏師古字籀京兆萬年人官至秘書監弘文館學士少博學精訓詁學善屬文多藏古圖畫器物書帖性所篤愛古篇奇字世所惑者討析申論必暢本源源

顏勤禮字敬官至著作郎幼而朗悟識量宏遠工於篆籀尤精詁訓秘閣司經史籍多所刊定與兄師古相峙俱以文學為崇賢弘文館學士太宗使蕭鈞贊曰依仁

服義懷文守一履道自居下帷終日德彰梓里行成蘭室鶴鑰馳稱龍樓委質

顏昭甫字周卿勤禮之子少聰穎工篆籀草隸書與內弟殷仲容齊名而勁利過之特為伯父師古所賞凡所注釋必令叅定為天皇曹王侍讀曹王屬有獻古鼎篆書二十餘字舉朝莫能讀昭甫盡能讀之

劉仁軌字正則陳留尉氏人位至尚書左僕射工正行書少好學值隋末喪亂不遑專習每行坐書空畫地遂

有能名

陸東之吳郡人虞世南之甥也官至太子司議郎善正
行草書李嗣真云東之學虞草體用筆則青出於藍故
非子雲之徒正隸工夫恨少不致高絕也張懷瓘云東
之少師世南臨寫所合亦猶張翼換羲之表奏蔡邕為
平子後身晚習二王尤尚其古中年之迹猶有怯懦總
章以後乃備筋骨殊矜質樸耻夫纖靡故欲暴露瑕疵
雖為時鄙回也不愚尤善運筆至於興會則窮理造微

然工於倣效劣於獨斷以此為少也

楊師道字景猷華陰人官至侍中中書令清警有才思

善草隸工詩

上官儀字游韶陝人官至西臺侍郎工文詞涉貫墳典
善書張懷瓘云楊師道上官儀劉伯莊並師法虞公過
於纂矣

殷開山名嶠以字行京兆鄠人官至吏部尚書鄖國公

開山涉書工為尺牘

實華云尺牘書題也見前漢陳遵傳

李懷琳洛陽人工臨寫善草隸好為偽迹嘗效王書大
急就兩本各十紙言詞鄙下而跋尾分明徐唐沈范蹤
跡烜赫勞茹裝背持以質錢貞觀中勅頻搜求彼之錢
主持以詣闕太宗殊喜賜縑二百疋懷琳乃上別本因
得待詔文林館書賦云爰有懷琳厥迹疎壯假他人之
姓氏作自己之形狀高風甚少俗態猶多吠聲之輩或
浸餘波

薛純陀太宗時官至秘書其書有筆法道勁精悍不減

歐陽詢張懷瓘云薛純陀學歐陽詢草書傷於肥鈍亦通之亞也

孫過庭字虔禮吳郡人官至率府錄事博通今古獨秀文華善正行草書張懷瓘云草書憲章二王用筆雋拔尚異好奇凌越險阻功用雖少而天材有餘真行之書亞於草矣嘗作運筆論甚得書趣與王知敬友善王則過於遲緩孫亦傷於急速使夫二子寬猛相濟是為合矣書賦云虔禮凡草間闔之風千紙一類一字萬同如

見疑於冰冷甘沒齒於夏蟲

錢穀善小篆飛白風流敏麗太宗甚賞其能

薛稷字嗣通河東人官至太子少保善書初貞觀永徽間虞世南褚遂良以書專家後莫能繼稷外祖魏徵家多藏虞褚書故銳精臨倣結體遒麗遂以書名天下畫又絕品睿宗在藩喜之張懷瓘云師學褚公尤尚綺麗媚好膚肉得師之半可謂河南公之高足當時無及之者甚為時所珍尚書賦云少保師褚菁華却倍超鼯鼠

之效能愧隋珠之掩類

魏叔瑜字思瑾鄭公之子善草隸書嘗以筆意傳其子
華及甥薛稷

魏華字茂實叔瑜之子官至太子左庶子世業清素尤
好書翰初與薛稷俱師於褚後習右軍行草其迹遂過
於師世稱善書者前有虞褚後有薛魏

裴行儉字守約絳州聞喜人官至禮部尚書工草隸行
書及章草高宗嘗以絹素令寫文選一部覽之秘愛其

法賚物良厚嘗謂人曰褚遂良非精筆佳墨未嘗輒書
不擇筆墨而研提者惟予與虞世南耳所撰草字雜體
數萬言傳於世

姜協字壽秦州上邽人善篆籀歷燕然都護夏州都督
封成紀縣侯謚曰威

殷令民陳郡人善正書與其子仲容皆以能書擅名一
時而令民筆法精妙不減歐虞

殷仲容令民之子官至禮部郎中善正書尤精題署武

后嘗詔仲容題資聖寺額王知敬題清禪寺額當時謂之雙絕書賦云殷公王公兼正兼署大乃有則小非無據麒麟將騰鸞鳳欲翥題二榜而迹在歎百川而身去王知敬懷州河內人官至太子家令工草行及章草尤善題署李嗣真云房僕射立雕文抱質王家令碎玉殘金房如海上雙鵝王比雲間孤鶴

王知慎知敬之弟官至少府監工書善畫與兄知敬齊名張彥遠名畫錄云長安靈苑寺西廊北院有趙武端

畫淨土變相知慎書甚有功

宋令文號州弘農人有勇力工書畫善屬文高宗時為
驍衛將軍東臺詳學正士世稱令文三絕書畫力也張
懷瓘云令文尤好於書備兼諸體偏意在草志欲究能
力用雖殷筋骨終寡亦得書之媚趣公有三子之問以
文詞知名之悌有勇力之繼精草隸世謂皆得父一絕
王紹宗字承烈廣陵江都人官至秘書少監少貧困嗜
學工草隸客居僧房寫書取庸自給張懷瓘云紹宗清

鑒遠識才高出羣書則祖述子敬欽羨東之其草則攻
乎異端度越繩墨其正行與章草則體象尤異沈邃堅
密然華不逮陸而古乃齊之嘗與人書曰鄙夫書翰無
功者特由水墨之積習耳當精心率意虛神靜思以取
之吳中陸大夫常以余比虞君以不臨寫故也聞虞被
中畫腹與余正同虞即世南也兄嗣宗亦善書師陸東
之甚有骨氣而性矛盾書賦云王秘監則首末全貞尊
道重德或終紙而結字或重模而足遵句墨瀟落風規

雄壯氣力播清譽而祖述屢見賞於有識如曲浦鴻飛
芳園桂植

高正臣廣平人官至衛尉少卿善正行草書習右軍之
法次之甲乙脂肉頗多骨氣微少睿宗甚愛其書張懷

瓘云先君

張紹光

強仕之年與高有舊朝士就高乞書或

憑先君書之高嘗為人書五十紙先君戲換五紙又令
示高高竟不辨客曰有人換公書高笑曰必是張公也
乃審詳之得三紙客曰猶有在高熟視之終不能辨陸

東之嘗為高書告身高常嫌之不將入帙後為鼠傷乃謂先君曰此鼠甚解正臣意其風調不合乃爾

李思訓唐宗室也官至右武衛大將軍彭城公早以藝稱高宗甚重之畫山水得名亦能隸筆李北海邕為其碑云思訓畫工神於鄭陸墨妙聖於鍾張

鍾紹京虔州贛人魏太尉繇十五代孫以善書直鳳閣武后時署諸宮殿明堂及銘九鼎皆其筆也尤善草隸當時呼為小鍾其字畫妍媚遒勁有法石泉公王方慶

素尚毫翰每還私第必請紹京盛論法書方慶嘗疾須
紹京言書輒差右相楊再思以為鍾君可愈王侍郎疾
也張昌宗搜訪天下圖書以紹京妙識古今奏請直秘
書寶匣奇蹟莫不徧覽明皇在藩邸愛重其書及即位
拜戶部尚書太子詹事紹京嗜書畫如王羲之獻之褚
遂良真迹家藏至數十百卷

賈膺福官至太子中舍人善八分筆法精妙可喜按舊
唐史云武后鑄九鼎圖寫山川物象命工書人賈膺福

薛昌容李元振鍾紹京等分題之

顏元孫字聿修昭甫之子少孤養於舅殷仲容家尤善草隸仲容以能書為天下所宗人造請者牋盈几輒令代遣得者欣然莫之能辨玄宗出諸家書迹數十卷曰聞公能書可為定其真偽公分別以進玄宗大悅賜箋籐筆墨衣服等物著干祿字書行於世

顏惟貞字叔堅元孫之弟官至太子文學薛王友仁孝友悌少孤育舅殷仲容氏蒙教筆法家貧無紙筆與兄

以黃土掃壁木石畫而習之故特以草隸擅名

杜審言字必簡襄陽人官至國子監主簿修文館直學士性滑稽雅善五言詩工草隸嘗謂人曰吾文章當得屈宋作衙官吾筆當得王羲之北面其矜誕類此

盧藏用字子潛幽州范陽人官至黃門侍郎才貌清雅工草隸大小篆八分善琴奕張懷瓘云幼尚孫薛晚師右軍雖闕於功績嫻於體艷八分之製頗傷疎怯呂摠云盧藏用八分如露潤花妍煙凝修竹

魏拈善章草及應命而作略無疑滯功夫越於子潛而氣魄不逮也

張旭蘇州吳人官至右率府長史善草書自言吾見公主擔夫爭路而得其意又觀公孫氏舞劍器而得其神性嗜酒每飲醉輒草書揮筆大叫或以頭搥墨中而書既醒自視以為神異不可復得世呼為張顛嘗私謂鄔彤曰孤蓬自振驚沙怒飛予師而為書故得奇怪凡草聖盡於此矣初仕為常熟尉有老人陳牒求判宿昔又

求旭怒其煩責之老人曰觀公筆迹奇妙欲以藏家耳
旭因問所藏盡出其父書旭視之天下奇筆也自是盡
其法旭以善草得名亦甚能小楷蓋虞褚之流也書賦
云張長史則酒酣不羈逸軌神澄回眸而壁無全粉揮
毫而氣有餘興若遺能於學知遂獨荷其顛稱

司馬承禎字子微洛州溫人隱天台華峯號白雲先生
開元中召至京師勅於王屋山置壇室以居善篆籀帝
命以三體寫老子刊正文句著坐忘論八篇年八十九

卒諡貞一先生

賀知章字季真會稽人官至秘書監自號四明狂客善草隸嘗與張旭游於人間凡人家廳館好牆壁及屏幃忽忘機興發筆落數行如蟲豸飛走雖古之張索不如也好事者具筆硯從之意有所愜不復拒然每紙纔十數字世傳以為寶天寶初請為道士還鄉里詔許之以宅為千秋觀仍賜剡川鏡湖一曲

宋詹字藏諸廣平人高尚不仕戶部侍郎宇文融薦授

秘書省校書郎善書作鍾體而側戾放縱迹不副名開
元末舉場中後輩多師之呂摠云宋儋書如暮春花發
夏柳枝低

李璆隴西人性疎達輕財重諾善書筆路緊媚亦有聲
於代書賦云宋儋李璆擅美中州李師王而意淺宋祖
鍾而體便

吳道元陽翟人官至寧王友工書善畫好酒使氣每欲
揮毫必須酣飲學書於張長史旭賀監知章其迹似薛

少保亦甚便利初名道子玄宗改名道元張懷瓘云吳生之畫筆下有神是張僧繇後身也

鄭虔鄭州滎陽人官至著作郎善圖山水好書常苦無紙知慈恩寺有柿葉數屋遂借僧房居之日取葉學書歲久殆遍玄宗愛其材為置廣文館以虔為博士嘗自寫其詩并畫以獻帝大署其尾曰鄭虔三絕呂摠云鄭虔書如風送雲收霞催月上

盧鴻字顗然其先范陽人隱於嵩山博學善篆籀及楷

隸開元初備禮徵至東都拜諫議大夫固辭還山廣學
廬聚徒至五百人

陸堅洛陽人初名友悌玄宗嘉其剛正更賜名堅官至
秘書監善書帝待之甚厚圖形禁中親製贊

李巖趙州高邑人歷官兵部侍郎善草隸

呂向字子回涇州人少孤託外祖母隱陸渾山工草隸
能一筆環寫百字若縈髮然世號連綿書官至工部侍
郎文詞學業當代莫比書賦云呂公歐鍾相雜自是一

調雖則筋骨乾枯終是精神嶮峭其於小楷尤更巧妙
梁昇卿善小篆八分呂摠云梁昇卿八分如驚波往來
巨石前却

郭謙光官至國子監丞善八分初不見稱於唐人獨歐
陽公修盛稱其字畫筆法不減韓蔡史李四家

韓擇木昌黎人官至工部尚書右散騎常侍工八分書
師蔡邕法風流閒媚為伯喈中興書賦云韓常侍則八分
中興伯喈如在光和美古今迭代昭刻石而成名類

神都之冠蓋

李邕字泰和揚州江都人官至北海太守善行書以文
名天下時稱李北海盧藏用嘗謂邕如干將莫邪難與
爭鋒翰林美事云李北海文章書翰公直詞辯義烈英
邁皆一時之傑夫人之藝術多不兼稱至於王逸少以
書掩其文李淳風以術映其學如公之藝六事咸絕古
今罕儔呂摠云李邕書如華岳三峯黃河一曲

書小史卷九

欽定四庫全書

書小史卷十

宋 陳思 撰

傳九唐

蕭誠蘭陵人官至右司員外郎工正書善摹勒弟諒亦
善書世謂誠真諒草開元中時尚褚薛誠為之最善李
邕每不重誠誠因採西山野麻號郡土穀造五色斑文
紙作王右軍書帖與之邕覽翫不悟謂其真迹誠因道

其所撰邕乃歎服

張庭珪河南濟源人官至太子詹事工八分書素與李邕親善屢上表薦之邕所撰碑碣必請庭珪八分書之甚為時人所重庭珪家多法書亦善正隸頗有獻之之法

史白廣陵人官至諫議大夫善飛白

史惟則字子華白之子官至殿中侍御史工八分頗近鍾書發筆方廣字形峻美亦為時所重尤善篆籀飛白

弟懷則亦善八分書賦云史侍御惟則必優世業階乎
籀篆古今折衷大小應變如因高而矚遠俯川陸而必
見

蔡有鄰濟陽人官至曹曹叅軍善八分始拙弱至天寶
中遂精妙相衛間多其筆迹

蔡希寂有鄰從子為洛陽令深工草隸頗為當時所稱
田琦雁門人武德功臣兵部尚書德平之孫工八分小
篆署書圖畫歷官豫蘄許等州刺史書賦云赫赫許昌

翰苑文房徵前賢而少對當聖代而難方

顧誠奢官至太子文學翰林院侍詔善八分杜甫集有
贈顧八分文學詩即誠奢也詩云中郎石經後八分蓋
顧頴顧侯運鑪錘筆力破餘地昔在開元中韓蔡同鼎
顧玄宗妙其書是以數子至此詩蓋謂誠奢也

韋陟字殷卿京兆萬年人風格秀整善文辭書有楷法
常以五彩牋為書記使侍妾主之其裁答投意而已皆
有楷法惟陟署名自謂所書陟字若五朵雲時人慕之

號卽公五雲體呂摠云韋陟書如蟲穿古木鳥踏花枝
韋斌陟之弟少修整好文藝善隸書與兄陟齊名天寶
中為中書舍人集賢院學士

衛包京兆人工八分古文小篆通字學兼象緯之術官
至尚書郎包以古文見稱於當時甚盛

蘇誦字廷言丞相瓌之子善八分瓌與東明觀道士周
彥雲素相往來彥雲將為其師建碑謂瓌曰成某志不
過煩相君數子耳五郎文頊六郎致石咏七郎書誦瓌

大策不言而心服其公

鄔彤錢塘人為金吾兵曹叅軍善草書妙得其法時人
比之張旭蓋親得張公之旨呂摠云鄔彤書如寒林栖
鷗平岡走兔

徐安貞善隸書初名楚璧開元中為中書侍郎嘗叅李
右相議後林甫用事恐罪累乃逃隱於衡嶽為掇蔬行
者而病啞不言數年後因修建佛殿僧中選善書者題
其梁已二三人矣徐行者跨梁而過掌事人怒以杖連

擊其背徐以手畫地曰口雖不言昔年曾學大書願試書及題數行羣僧皆悅服因遣盡書之後李邕過寺見其題處大驚召之同載而歸

胡需然安定人工行書八分小篆筆法雖未至而媚熟可喜上黨佛寺畫壁多需然所書

李造隴西人官至起居舍人武都公善隸書入能品

李潮杜甫之甥善八分小篆杜甫盛稱之以比蔡有鄰

韓擇木

見杜集八分小篆歌

徐嶠之越州人官至廣平太守善正行草書名冠古今
無以為比常以其法授其子浩嶠之神道碑云初獻策
十八篇進書六體明皇手詔荅曰得所進書甚可觀覽
回鸞顧鵲隆露凌雲既極臨池之功足方懸帳之妙今
賜物三十段用彰翰墨之佳也

徐浩字季海嶠之子官至彭王傅會稽郡公善正行
草書四方詔令多出浩手遣辭贍速而書法至精帝喜
之嘗書二十四幅屏八體皆備草隸尤工世狀其法曰

怒猊抉石渴驥奔泉

王維字摩詰太原祁人官至尚書右丞與弟縉齊名維
工草隸善畫能詩名盛於開元天寶間豪英貴人虛左
以迎寧薛諸王待若師友畫思入神至山水平遠雲勢
石色繪工以為天機所到學者不可及也其詩自云夙
世定詞客前身應畫師

王縉字夏卿維之弟官至丞相善草隸書功超薛稷國
史補云縉與維名望首冠一時議者云論詩則王維崔

顗論筆則王綰李邕祖詠張說不得預焉

李陽冰趙郡人官至將作大匠工於小篆初師李斯嶧山碑後見仲尼吳季札墓誌變化開闔龍蛇盤踞勁利豪爽風行雨集文字之本悉在心胃自言得篆籀之宗旨斯翁之後直至小生曹喜蔡邕不足數識者謂之倉頡後身從子騰亦工小篆書賦云吾家世業趙郡李君嶧山並驚宣父同羣洞於字學古今通文家傳孝義意感風雲

張譔官至刑部員外郎明易象丹青善草隸與王維李
頎為詩酒丹青之友李頎答詩云小王破體嫻文策落
日梨花照空壁詩堪記室妬風流畫與將軍作勅敵一畫

作書

李權淮安王神通之曾孫歷官金州刺史工八分

李樞權之弟官至侍御史工小篆

李平鈞權之姪官至江陵掾富詞學工小篆兼妙山水
並冠絕一時書賦云溫良之德書畫兼美誠依仁以游

藝同上善之若水

鄭遷及弟邁逾並工八分遷官至浚儀尉季弟逾兼善山水天寶中知名梁宋書賦云滎陽昆弟内外光華揮毫美麗自是一家幼弟曰逾丹青大誇信斲玉而剖石即揀金而披沙

張懷瓘海陵人為翰林供奉右率府兵曹叅軍善正行草書亦能臆斷呂摠云懷瓘草書如露花濯錦淵月沉珠懷瓘每云書者猶人相知始疎而終密則大同始密

而終疎則大異小人甘以壞君子淡以成耀俗之書甘而易入乍觀肥滿悅心豁目亦猶鄭衛之在聽焉撰評書藥石論書斷書佑等書行於世弟懷瓌亦善書官至盛王府司馬待詔翰林

顏允南字去惑惟貞之子官至國子司業少以詞藻擅名工草隸書尤善五言詩深為伯父元孫所稱

顏真卿字清臣允南之弟官至太子太師魯國公少勤學孝敬有文辭善正行書結筆濃秀尤尚字學可謂書

之大雅矣陸羽嘗論其體得義之之筋骨心肺也公受筆法於張長史又嘗問法於釋懷素素告以圻壁路公曰何如屋漏痕素起捉公手曰老賊得之矣

張志和字子尚婺州金華人性高邁不拘自稱煙波釣徒著玄真子亦以自號與顏魯公友善工草書跡甚狂逸亦善圖山水自為漁歌畫之甚有逸思

韓滉字太冲京兆長安人官至左僕射平章事封晉國公工隸書章草尤善雜畫書得張旭筆法畫與韓幹相

埒自言不能定筆不可論書畫以非急務故自晦不傳
於人

張從申官至大理司直志業精絕工正行書握管用筆
期於結字緊密近古所無恨於歷覽不多聞見遂寡右
軍之外一步不窺意多搨書闕於真迹黃長睿云從申
雖學右軍其原出於大令筆意與李北海同科故名重
一時宜不虛得但所短者抑揚低昂太過又真不及行
耳然唐人而有晉韻殊可嘉尚弟從師監察御史從義

從約灼然有才並工書皆得右軍風規時人謂之張氏
四龍書賦云張氏四龍名揚海內厥有季弟功夫少對
右軍風規下筆斯在季謂從申也

劉繪彭城人為延安都督善書

明若山平原人為京兆三原縣尉大理評事善書書賦
云延安君則快速不滯若懸流得勢三原君則婉媚工
密似垂楊應律

竇蒙字子全官至國子司業善書書賦云吾兄則書色

雜體首冠衆賢手關目瞥瞬息彌年比夫得道家之深
旨習閭風而欲仙

竇泉字靈長蒙之弟官至刑部員外郎詞藻雄贍草隸
精絕著述書賦一篇兄蒙為之注

喬龜年善小篆養母至孝大歷中每為人寫大字獲其
錢以供甘旨

瞿令聞善八分古文倒薤藝兼篆籀

齊皎高陽人官至澤州刺史曉音律善大篆工小楷筆

蹟雄壯

林傑字智周閩川人精琴瑟善草隸俱自天然不因師授

徐璿浩之子幼勤學善真行書能別識書畫

徐峴璿之弟善正書

索滋字德深蔡州人官至兵部尚書強學博記工篆隸有古法

吳通玄海州人與弟通微皆博學善文章並侍太子游

德宗立弟兄踵為翰林學士並知制誥通微工行草書翰林習之號院體

沈傳師字子言蘇州吳人官至吏部侍郎材行有餘工書有楷法

柳子厚河東人少精敏文章卓偉善書家蓄魏晉尺牘甚富臨池訣云柳宗元與劉禹錫得筆法於皇甫閔以宗元為入室禹錫及門宗元自矜其書然亦不甚工

裴潏河東聞喜人官至兵部侍郎篤學善隸書

裴休字公美孟州濟源人官至吏部尚書太子少師能文章善正書體法道媚休早隸於河內後登顯位乃建刹於彼目為化成寺尋授太原節制經由是寺寺僧粉壁陳筆硯候公親題之公神色自若以衣袖搵墨以書之字勢奇絕

柳公權字誠懸官至太子少師善正行書初為夏州李聽掌書記穆宗即位入奏事召見謂之曰朕常於佛寺見卿筆蹟思之久矣即日拜右拾遺充翰林侍書學士

遷右補闕司封員外郎穆宗臨朝召問公權筆何盡善
對曰用筆在心心正則筆正上改容知其筆諫也公權
初學王書遍閱近代筆法體勢勁媚自成一家當時公
卿大臣碑版不得公權手筆者人以為不孝外夷入貢
皆別署貨貝曰此購柳書文宗夏日與學士聯句帝曰
人皆苦炎熱我愛夏日長公權曰薰風自南來殿閣生
微涼時丁未五學士皆屬繼帝獨諷公權兩句曰詞清
意足不可多得乃令公權題於殿壁字方圓五寸帝視

之嘆曰鍾王復生無以加焉大中初轉少師中謝宣宗
召升殿御前書三紙軍容使西門季元捧硯樞密使崔
巨源過筆真書十字曰衛夫人傳筆法於王右軍行書
十一字永禪師真書千字文得家法草書八字曰謂語
助者焉哉乎也賜錦綵瓶盤等銀器仍令自書謝表不
拘真行帝尤奇惜之嘗書京兆西明寺金剛經有鍾王
歐虞褚陸諸家法自謂得意

柳仲郢字諭蒙公權從子幼嗜學工草隸札節九經三

史魏晉已下南北史分門上下凡三十卷號柳氏自備
小楷精謹無一字行書當時甚賞其工

盧知猷字子暮官至太子太師器度渾厚文詞瞻麗工
草隸有楷法落簡飛翰人爭摹倣

唐元度官至翰林待詔沔王友善小篆名於一時筆法
柔弱無復前人之比而流俗妄稱惜之

于僧翰河南人特工八分與貝靈該俱擅名江左靈該
効明皇書筆力柔弱畧盡而已僧翰師韓擇木字勢妍

美筆畫遒勁兼用篆法然其格律不高亦自成一家爾
周墀字德升汝南人官至尚書右僕射長於史學尤工
小篆見稱於一時字畫頗佳傷於柔媚

陸希聲博學善屬文工書得其法凡五字撇押鉤格抵
用筆雙鉤則點畫遒勁而盡其妙謂之撥鐙法希聲自
言昔二王皆傳此法自斯翁以至陽冰皆得之希聲以
授沙門詵光光入長安為翰林供奉引希聲於貴倖昭
宗召為給事中後位至宰相

僧懷素字藏真長沙人疎放不拘細行頗好筆翰貧無紙可書嘗於故里種芭蕉萬餘株以供揮灑書不足乃漆一盤書之又漆一方板書至再三盤板皆穿吏部尚書韋陟見而賞之曰此沙門札翰當振宇宙大名授筆法於金吾兵曹鄔彤彤嘗謂懷素曰草書古勢多矣惟太宗以獻之書如凌冬枯樹寒寂勁硬不置枝葉張旭長史又嘗私謂彤曰孤蓬自振驚沙怒飛余師而為書故得奇恠凡草聖盡於此懷素不復應對但連呌數十

聲曰得之矣顏魯公嘗問師曰夫草書於師授之外師有自得之乎師曰貧道觀夏雲多奇峰輒嘗師之夏雲因風變化乃無常勢又遇壁坼之路一一自然顏公曰噫草聖之淵妙代不絕人可謂聞所未聞之旨也

釋高閑善草書師懷素深窮體勢韓文公嘗以序送之極稱其善張祐承古亦有詩云卷軸朝廷餞書函內庫收

釋亞栖洛陽人善草書自云其書如飛鳥出林驚蛇入

草嘗對御草書兩賜紫袍有詩云通神筆法得玄門親
入長安謁至尊莫恠出來多意氣草書曾悅聖明
君

釋貫休蘭溪人善詩詩工草隸南土皆比之懷素尤善
丹青多畫佛像

釋詵光善書受撥鐙法於陸希聲自後書法頗長先入
長安為翰林供奉希聲猶未達因寄詩曰筆下龍蛇似
有神天池雷雨變逡巡寄言昔日不龜手應念江頭泝

辭人詈光因引薦希聲於貴倖後至貴顯

釋洪堰博學儒釋風姿秀整能講唱詩篇草隸皆極精妙時人以其貌義詩書謂之四絕

五代楊凝式字景度唐相涉之子有文辭善筆札歷仕梁唐晉三朝佯狂不任事累官至太子少師致仕居洛陽延福坊其書法自顏以入二王之妙洛人得凝式真蹟夸詡以為希世珍西洛寺觀二百餘所題寫幾遍時人以楊風子呼之

羅紹威字端已魏州貴鄉人仕梁累拜太師中書令少好學工書頗知屬文聚書數萬卷開館以延四方之士馬允孫字慶先棣州人少好學事後唐為宰相晉時以太子賓客罷歸洛陽嗜八分書

李鶚後唐清泰中仕至國子丞九經印板多其所書當時頗貴重之其筆法蓋出歐陽率更然窘於法度而韻不能高非名書也

李從曠茂貞之子善書畫仕後唐襲為鳳翔節度


南唐後主李煜字重光善屬文工書畫王師克金陵俘
至京師赦之為違命侯煜又能作撮金書自言得筆法
於先王然枯勁無可取者

韓熙載仕李煜官至中書侍郎才俊氣逸工書畫特善
八分皆冠絕當時

徐鉉字鼎臣金陵人隨李煜歸朝官至散騎常侍好字
學善篆隸初學李陽冰後得李斯嶧山碑潛思改作遂
逼其勢第錯亦能八分小篆而筆法頗少力其在江南

皆以文翰知名號二徐為學者所宗

郭忠恕字恕先洛陽人七歲童子及第漢周之際為湘陰公從事工古文小篆八分亦能楷法尤善字學著古文汗簡十卷全倣許氏說文偏旁凡五百四十一字太宗朝官至國子監主簿



書小史卷十